



Ured u Sarajevu
Broj: Ž-SA-05-962/15
Sarajevo, 24.11.2015.godine
Preporuka broj: P-240 /15

OPĆINSKI SUD U BANOVIĆIMA

Banovići

na broj: 127 0 P 055750 14 P

P R E P O R U K A

u vezi sa žalbom Mostarlić Ibrahima

I Činjenično stanje

Institucija ombudsmena za ljudska prava Bosne i Hercegovine (u daljem tekstu: Institucija ombudsmena), zaprimila je dana 14.10.2015.godine, žalbu Mostarlić Ibrahima i predmet je registriran pod brojem Ž-SA-05-962/15.

Predmet žalbe podnosioca je povreda prava na pristup pitkoj vodi i priključenje na mjesnu vodovodnu mrežu Gornji Kasumovići, iz razloga što se žalitelju već više od deset godina onemogućava priključenje na vodovodnu mrežu. Institucija ombudsmena u više navrata postupala je u predmetima Mostarlić Ibrahima (Ž-BR-05-334/11, Ž-BR-05-28/14, Ž-BR-292/15). Dana 26.12.2013.godine Ombudsmeni BiH u konkretnom slučaju izdali su preporuku broj **P-322/13**.

U predmetu žalbe Mostarlić Ibrahima, novozaprimljene dostavljene dokumentacije, vidljivo je da su organi uprave, sudovi donosili odluke u korist Mostarlić Ibrahima. Međutim, do danas tj. 05.11.2015. godine Mostarlić Ibrahim nije ostvario zaštitu prava na pristup pitkoj vodi. Pred Općinskim sudom u Banovićima u toku je postupak u predmetu **127 0 P 055750 14 P**, tužitelj Mostarlić Ibrahim protiv tužene MZ Banovići selo – odbor mjesnog vodovoda Kasumovići Gornji... radi priključenja na mjesni vodovod.

Cijenimo važnim ukazati na slijedeće. Voda je javno dobro neophodno za život i zdravlje. Univerzalno ljudsko pravo na čistu i dostupnu pitku vodu te odvodnju 2010. prepoznali su Ujedinjeni narodi kroz Rezoluciju 64/292 koja eksplicitno priznaje ovo ljudsko pravo te činjenicu da su voda i odvodnja ključni za zdrav život. Rezolucija poziva države i međunarodne organizacije da omoguće finansijske resurse i pomoć u građenju kapaciteta i transferu tehnologije s ciljem pružanja sigurne, čiste i pristupačne pitke vode i odvodnje za sve. Unatoč tome mnogi ljudi i dalje ne uživaju ovo pravo. Cjelokupan postupak Mostarlić Ibrahima kojim on zaštitu ljudskih prava, prava na pitku vodu i odvodnju traži dugi niz godina je svakako izvan razumnog roka i predstavlja direktno kršenje člana 6. *Evropske Konvencije za zaštitu ljudskih prava i osnovnih sloboda*.

II Relevantno zakonodavstvo

Ustav Bosne i Hercegovine - član II/2. (Aneks IV Općeg okvirnog sporazuma za mir u Bosni i Hercegovini)

... Bosna i Hercegovina i oba entiteta će osigurati najviši nivo međunarodno priznatih ljudskih prava i osnovnih sloboda...

Evropska konvencija za zaštitu ljudskih prava i osnovnih sloboda - član 6. stav 1. (stupila na snagu 03. 09. 1953. godine)

Svako, tokom odlučivanja o njegovim građanskim pravima i obavezama ili o krivičnoj optužbi protiv njega, ima pravo na pravičnu i javnu raspravu u razumnom roku pred nezavisnim i nepristrasnim sudom, obrazovanim na osnovu zakona.

Zakon o Ombudsmenu za ljudska prava Bosne i Hercegovine – član 4. stav 2.

Ombudsmen se neće miješati u proces odlučivanja sudova, ali može pokrenuti sudske postupke ili intervenirati u toku postupka koji se vodi, kad god ustanovi da je takva aktivnost neophodna pri obavljanju svojih dužnosti. Ombudsmen također može dati preporuke organu vlasti koji je strana u postupku ili biti konsultiran od strane u postupku.

Uzimajući u obzir naprijed izneseno, Ombudsmeni Bosne i Hercegovine, shodno odredbama člana 32. Zakona o Ombudsmanu za ljudska prava Bosne i Hercegovine, donose:

PREPORUKU

1. da Općinski sud u Banovićima, imajući u vidu naprijed izneseno činjenično stanje, stanje u spisu predmeta koji se vodi kod Općinskog suda u Banovićima, razmotri mogućnost davanja prioriteta u radu predmetu broj **127 0 P 055750 14 P**.
2. da u roku od **15 (petnaest) dana**, od dana prijema ove Preporuke obavijesti Ombudsmene o načinu ispoštovanja ove preporuke.

S Poštovanjem,

OMBUDSMANI BOSNE I HERCEGOVINE

Jasminka Džumhur, s.r.

Nives Jukić, s.r.

Ljubinko Mitrović, s.r.

Co.1x podnositelju žalbe

1x u spis predmeta